

# Kerajaan pertimbang insentif RM100 kepada pelajar IPT

Oleh MOHD. HUSNI  
MOHD. NOOR  
utusannews@mediamulia.com.my

**CYBERJAYA:** Kerajaan akan mempertimbangkan insentif sekali beri (*one-off*) RM100 kepada pelajar universiti bagi meringankan kos sara hidup yang semakin meningkat.

Itu respons Perdana Menteri, Datuk Seri Anwar Ibrahim ketika menjawab pertanyaan seorang pelajar Universiti Multimedia (MMU) pada program Temu Anwar di sini, semalam.

Terdahulu, seorang pelajar MMU mencadangkan kepada Perdana Menteri supaya mempertimbang insentif *one-off* RM100 kepada pelajar universiti di negara ini.

Anwar berkata, beliau menerima baik cadangan itu dan akan memberi pertimbangan sewajarnya pada pembentangan Belanjawan 2026, Oktober depan.

"Saya terima baik cadangan itu dan saya akan beri pertimbangan yang wajar untuk belanjawan (Belanjawan 2026) bulan Oktober ini," katanya.

Ketika ini terdapat kira-kira 1.2 juta pelajar institusi pengajian tinggi merangkumi universiti awam, swasta, politeknik, kolej komuniti dan kerajaan perlu memperuntukkan sebanyak RM120 juta.

Perdana Menteri sebelum ini mengumumkan pemberian RM100 secara *one-off* kepada setiap warganegara berusia 18 tahun dan ke atas, melalui



**ANWAR Ibrahim melawat pameran pada Majlis Temu Anwar dan Perasmian Fakulti Kecerdasan Buatan dan Kejuruteraan Universiti Multimedia (MMU) di Cyberjaya, semalam. - UTUSAN/FAIZ ALIF ZUBIR**

MyKad bawah program Sumbangan Asas Rahmah (SARA).

Anwar berkata, walaupun rakyat berdepan kenaikan kos sara hidup namun, harga barangan keperluan seperti bahan api, ayam, telur dan gula masih jauh rendah berbanding

negara-negara ASEAN.

"Apakah ia (kenaikan kos sara hidup) tidak merunsingkan, ia merunsingkan tetapi hal itu kita harus tangani dengan sebaik mungkin.

"Pada masa sama, sistem perolehan negara juga harus

telus kerana ia penting bagi menjimatkan belanja kerajaan.

"Dalam tempoh setahun dua ini, Lembaga Hasil Dalam Negeri (LHDN) telah menyelamatkan kira-kira RM5 bilion hasil negara," katanya.